

WWW.APIAZZETTA.COM

#05 - MARZU - APRILE 2010



# A PIAZZETTA

UN GIURNALE SCHERZOSU, PULITICAMENTE SCURRETTU È CERTE VOLTE APPENA GATTIVU...



u bilanciu di l`anni

# 2000



U PRIMU TABLOID  
GRÀTISI IN  
LINGUA CORSA

0€

Intervista 1N2  
incù Marina Raibaldi



E vere dumande  
ch`ellu ci vole à pònesi



Ciò ch'è s'hè **veramente** passatu...



## Identità francese

Eric Cantona porta a so cuntribuzione à u dibattitu nant' à l'identità francese : «Etre français est-ce que c'est devoir parler français, chanter la Marseillaise, lire la lettre de Guy Môquet ? Ça c'est être con !» Eccu, cusì hè detta.



## Identità corsa

Cuntribuzione à u dibattitu nant' à l'identità corsa di u rè di i spazzafume, cugnumatu Mickael Vendetta : « Je me sens corse ! Les jeunes corses me ressemblent : ils aiment la muscu, les bagnoles, les boites, les DJ et les fringues ! » Difficiule di dalli tortu...

## Beyoncé

hà datu un cuncertu in Libia per Hannibal Khadafi, u figliolu di l'altru. Prezzu pè un'ora di cuncertu : 2 milioni d'euro. Òn hè micca quist'annu ch'ellu si viderà a canterina à e Ghjurnate di Corti o à e Musicale di Bastia.

## Bona nutizia

nant' à u pianeta ci sò di più alduti obesi ch'è di zitelli ch'è soffrenu di malnutrizione. Piantate puru di mandà i vostri scocchi à Action contre la faim è à Médecins sans frontières.

## Victoria Beckham

hà plasticatu u so contu in banca cù a so Golden Card pè Natale : più di d'un milione d'euro frazati pè i magazzini di Milano. È ùn si parla mancu di i saldi...



## A playlist di i dittatori

U Daily Telegraph hà publicatu a lista di e canzone preferite di i dittatori. S'ampara ch'è Ben Laden hè fan di Whitney Houston è di Van Halen. À Mugabe li piace Cliff Richards. Khadafi si techja di Lionel Richie, Ahmadinejad passa à fondu Scorpion è Kim Jong-Il cunnosce tuttu d'Eric Clapton. « La musique adoucit les mœurs », dice u francese... (www.telegraph.co.uk)



## + 48 % di frigò vinduti nanz'à l'elezzioni

Sò spachji i magazini d'*électro-ménager*. À Conforama cum'è ind'è But, e ghjaccere, forni è lavapiatti si sò vinduti benissimo u mese prima di l'elezzioni. Risponsèvule : i «rigali» ch'elli volenu fà l'eletti primurosi di i so elettori. Ma quì dinù, l'affari ùn sò più quelli di tandu.

Spiega un elettu : « Vint'anni fà un frigò ci purtava cinquanta voti. Oghje, s'è vo avete quattu voti in più hè digià bè ! In più di quessa, a ghjente hè ecchippata, avà volenu tutti i screni LCD, u frigò americanu, u Blu-Ray è a Nespresso ! Hè un scàndalu di fà una campagna elettorale in ste cundizione ! » Peghju : un elettu s'hè ritruvatu cù un stock di *magnétoscopes* VHS chì più nimu vole. Tuttu scappa...



### Catinu 2009

Hè u tempu di e ricumpense : Awards, Oscars, Cesars, Gérard eccetera. Nant'à u situ di A Piazzetta ([apiazzetta.com](http://apiazzetta.com)) era organizatu un votu per eleghe u catinu di l'annu 2009. In 2008 avia vintu Christian Clavier, davanti à Christophe Barbier è i famosi « Obamistes d'Ajaccio ». Quist'annu, u vincitore si chjama Paul Giacobbi (20% di i voti) davant'à Christophe Barbier (14%) è l'anzianu ghjucadore di u Sporting Salim Arrache (14% dinù). Luntanu in daretu truvemu à Susan Boyle, Thierry Henry, David Guetta, Jacques Séguéla, Frédéric Mitterrand è Johnny Hallyday.

### Crisa

Attentatu à a bicicletta splusiva in Irak. Ghjè veramente a crisa.



# U bilanciù di l'anni 2000

## Paura

A parolla di u decenniu

Principiatu cù l'ondecì settembre, l'anni 2000 seranu quelli di e paure : di u terrorisimu, di e malatie, di l'epidemie, di e crise, di e catastrofe eculògiche, di u riscaldamentu climàticu. È sopr'à tuttu di a falata di u Sporting...

## A securità

Tendenza mundiale

Cù l'attaccu di u World Trade Center, principia u decenniu di l'ultra-securitariu è di u rinculu di e libertà. Ci vole à cuntrulà, surveglià, filmà, fiscià. Sò l'anni di a video surveillance, di i fisciè pulizzeri, i « scanners corporels » è di a pussibilità di lucalizà ognunu. Hè a fine di a vita privata. È in più di quessa, ci hè Facebook.

## Televisiò

U decenniu serà marcatu da un dannu novu, a tele-realtà

A strage cummencia cun Loft Story. Veneranu dopu 10 anni di scumpienti cun Koh-Lanta, Popstar, Ile de la tentation, Star Academy, Bachelor, la Ferme célébrités, Supernanny, Fear Factor, Secret Story ecc... Ancu di grazia, ci seranu e serie TV americane : 24, Prison Break, Sex and the City, The Shield, Lost, Dr House, Desperate Housewives, Six Feet Under, Rome... In Francia, si prucece à «Plus belle la vie»..

## Maestri di u mondu

Si chjamanu George W. Bush, Vladimir Poutine, Nicolas Sarkozy, Silvio Berlusconi, Hu Jintao, Tony Blair, Mahmoud Ahmadinejad è Oussama Ben Laden. Difficile di sperà in l'avvene cun sta dream team di spavechji...







## Musica

### Difficiele di fà peghju

U r'n'b è u hip-hop cunnoscenu a cunsacrazione (Dr Dre, Eminem, Kanye West, 50 Cent, Snoop Dog è Diam's). Sìmbulu di puvertà : i «dj» sò mudelli di riescita (Bob Sinclar, David Ghjetta, Martin Solveig). Nasce è more prestu a tecktonik. In Francia, hè un veru macellu : Christophe Maé, Calogero, Raphael, Bénabar, Renan Luce, Vincent Delerm... Ancu di grazia, ci fermanu The Libertines, Muse, Bloc Party, Radiohead, Blur, Coldplay, Didier Super, Norah Jones, Gorillaz, Lily Allen, Ben Harper, Arcade Fire, Franz Ferdinand, The Strokes è The Killers. Perdimu à Michael Jackson, Alain Bashung, Barry White. Johnny Hallyday ellu ci hà fattu sperà...

## Futbol

### L'anni 2000 cumminciavanu male

Campione di u mondu, a Francia vince l'Euro 2000. Cù i soldi è a mundializazione, u ballò diventa futbol-business, vale à dì n'importa chè : troppu muneta è ghjucadori mercenarii pagati troppu. Ancu di grazia, ci seranu u Sénégal in 2002, Charisteas in 2004, Materazzi in 2006 è Domenech tuttu u tempu per impedisce di fà vince a Francia. È u Barça, a Mannschäft è l'Argentina per cuntinuvà à pudè fidighjà u ballò.

## Pulitica

### 10 anni di diritta

In u 2002 i Francesi votanu di manera massiccia contr'à Le Pen pè purtà à Sarkozy à u putere in u 2007. Ùn avemu sempre micca nutizie di a manca è di u PS.

## Sinemà

### Parechje catastrofe

Bienvenue chez les Ch'tis, Astérix, L'Enquête corse, Les Choristes, Les Bronzés III sò i grossi successi di l'anni 2000. Ancu di grazia ci seranu Le seigneur des anneaux, Clint Eastwood, i fratelli Coen, Sean Penn, Martin Scorsese, Monica Bellucci, Halle Berry, Scarlett Johansson, Angelina Jolie è Tommy Lee Jones.

## Tennulogie

In l'annu 2000, ci vole à utilizà un modem 56k per andà nant'à internet è cù u Nokia 3210 si ghjoca à u «serpent». Dece anni dopu à sta prestoria, l'ADSL, l'iPhone, u web 2.0, i screni platti, a chjave USB è u situ apiazzetta.com anu cambiatu a vostra manera di campà.

# U bilanciù di l'anni 2000

## Musica corsa

### Cuntinuvehjanu i pistelli

Canta u Populu Corsu, Diana di l'Alba, L'Arcusgi, A Filetta, I Chjami Aghjalesi, Felì... Sò nati talenti novi cù I Cantelli, i Novi, Sekli, L'Altru Latu. È i Sumeri Castrati, cunniscite ? Pè ride : Jenifer è Alyzée.

## Corsica

In u 2000, a pupolazione di a Corsica hè di 260.000 abitanti. À u capu di a CTC ci hè José Rossi è Jean Baggioni à l'esecutivu. A Corsica sorte scuzzulata da l'anni 90 : guerra trà naziunalisti, assassinii d'Erignac, affare Bonnet. Ma à u principiu di l'anni 2000, si spera in u «processus Matignon» vultutu da Jospin. U PEI chì duvia «richjappà u ritardu storicu» di a Corsica in materia d'infrastrutture ferà «pschitt».

Sarkozy piglia a rilleva. In u 2003 Yvan Colonna hè arrestatu nanz'à u referendum nant'à l'evuluzione istituziunale di a Corsica. Vincent Andriuzzi è Jean Castela piglianu 30 anni di prigiò nanzu d'esse disculpati trè anni dopu. Smarisce Natale Luciani. I tempi cambianu, un fast food apre e so porte in Aiacciu in u 2005.

In 10 anni, a Corsica hà vintu 40.000 abitanti. In ogni locu corre u bettonu, grande minacce pesanu nant'à u bor'di mare. L'internu cuntinuvehja di viutassi à

prufittu di e cità è di u litorale. L'ecunomia si sviluppa solu trè mesi d'estate per via di u turisimu. Grandi gruppi capitalisti è maffie s'impatruniscenu di l'ecunomia è s'arricchiscenu. A sucetà ella s'impuverisce. Piantemu quì u bilanciù ?

## Sò smariti

U francu, a sigaretta in i caffè, a VHS, a dischetta d'ordinatore, u World Trade Center, u rhinocéros neru, u Polaroid, u teleffunu fissu, Michael Jackson, RCI, a brise de mer, u 3615 Ribombu, l'Amnesia.

36 15  
code  
RIBOMBU



## Chemins de Fer de la Corse

BASTIA	04 95 32 80 61	Vivario	04 95 47 20 13
Casamozza	04 95 36 00 11	Tattone	04 95 47 21 22
Ponte Novu	04 95 38 60 72	Vizzavona	04 95 47 21 02
PONTE LECCIA	04 95 47 61 29	Bocognano	04 95 27 40 51
Francardo	04 95 47 40 48	AJACCIO	04 95 23 11 03
CORTE	04 95 46 00 97	ILE ROUSSE	04 95 60 00 50
Venaco	04 95 47 01 32	CALVI	04 95 65 00 61

BOITE VOCALE-HORAIRE  
04 95 32 80 60



# Vende a Corsica

## per empie e casce ?



**À u nordu anu i soldi è u tempacciu. In u sud, e casce sò viote è ci hè u sole. I deputati alemani anu prupostu à a Grecia in crisa di cumprà una di e so isule.**

A Grecia hà più di 6.000 isule deserte à u sole è hè fuscata. L'Alemani anu i soldi è quassù face tempacciu tuttu l'annu. U deal hè chjaru : « On vous donne du fric, vous nous donnez Corfou ». È quessa in un imbuleghju di discorsu à a moda « on en a marre de payer pour les feignasses du sud » è di pretensione di ricchi chì sanu chì cù i soldi si ponu tuttu permette. A pruposta hè seria è piace ancu à i membri di a CDU, u partitu d'Angela Merkel à u putere. Da leghje nant'à LeMonde.fr. Ind'è i nostri amichi tedeschi a pruposta face fantasmà. Pensate appena, si cotranu tuttu l'annu in i lochi bughjicosi di a Ruhr, allora a pussibilità di cumprassi un'isula à u sole...

U giornale Bild ripiglia sta nutizia chì ne ralegra più d'unu. Postu chì tuttu si pò cumprà in stu mondu è chì a Grecia, sbaiuccata, cunnosce una crisa tremenda, l'idea face u so caminu è ùn stona à nimu. Digà in u 93 certi deputati tedeschi avianu prupostu à a Spagna di cumprà l'isula di Maiorca, in e Baleare chì hè frequentata sopr'à tuttu di turisti alemani.

### È ind'è noi allora ?

Viste e debbite di a CTC è quelle di u statu francese (in «faillite» avia dettu François Fillon...), perchè micca vende un pezzu di Corsica à l'Allemagna, a Russia o qualchi riccu amatore di sole ?

Perchè micca vende Rondinara o l'Agriate per finanza à u PEI ? Perchè micca barattà Sperone o e Calanche di Piana contr'à un tunnelli in Vizzavona ? L'isula di Cavaddu contr'à una «station d'épuration» ? Palombaghja contr'à a custruzione di u stadiu di Furiani ?

Per avà ùn ci hà pensatu nimu, ma quelli chì anu i soldi ùn mananu micca di pretensione. È quelli chì sò appressu à i soldi ùn si vergognanu di nunda. À cuntinuvà à esse povera è sottu sviluppata, a Corsica hè cundannata à diventà una preda faciule è dilicata per i ricchi speculatori.





# 12



## cummandamenti di i sustenidori di u Sporting

Perchè chì u SCB hè u club di a Corsica è d'un populu sanu, perchè chì ancu s'ellu fala in National, seremu daretu à ellu... Eccu i dodici cummandamenti chì ogni sustenidore turchinu si deve di rispettà...

### **1** Anti fair play, serai...

E partite, sò fatte per esse vinte, pocu impreme u spetàculu. U fair-play è e fughjichje di Pierre de Coubertin, sò per i losers !

### **2** Criticà, ferai...

U veru sustenidore di u Sporting truverà sempre à di. Contr'à u scemà tatticu, contr'à l'intrenore, contr'à a maglia, contr'à u sandwich à a mi-temps, contr'à quelli chì cantanu, contr'à quelli chì stanu à pusà... Hè cusì, semu nati criticoni.

### **3** Sciappà tuttu, ferai...

In spiazamentu u tifosu turchinu hè cum'è un leone surtitu da a so gabbia. O piuttosto cum'è un gremlin's. Chì piacè di fassi rimercà, di fà u tazzu, di mette a panicca, è di pigliassi e ruchjittate di i flicchi...

### **4** Anti Nizza è anti OM, serai...

U veru turchinu cunnosce a storia di u club è quella di a tifoseria bastiaccia. Più grandi nemichi : nizzarda è marsegliesi.

## **5 Per un scemu, passerai...**

Per cuntinuvà à sustene sta squadra quand'ella hè ultima di seconda divisione, ci vole à esse appena tontu. Ah ! Hè vera ch'ellu hè più faciule di sustene à Manchester, l'OM, u Barça o u Milan AC...

## **6 Contr'à l'arbitre, serai...**

Sustenidore, sai bè chì dapoi ch'ellu esiste u futbol, ci hè un cumplottu contr'à i club corsi. L'arbitri, a FFF, Thiriez, i CRS, Broussard, i flicchi, a LFP, Sarkozy è Thierry Roland, tutti anu listessu scopu : mette fora u Sporting.

## **7 A squadra di francia, ùn sustenerai...**

Ogni disfatta di i bleus hè festighjata. L'eroi si chjamanu Kostadinov, Charisteas è Materrazzi. U 12 lugliu 98 ùn hà mai esistitu.

## **8 I macciacci, i t'abbuchjerai...**

Face una bella stonda chì u Sporting ùn sà più vince. A disfatta hà cunnosci bè. Ma à forza, ti s'è abituatu...

## **9 I pattoni è i cazzotti, apprezierai...**

Un bellu tackle, una simpàtica cazzuttata nant'à

u terrenu, un bellu pattone, eccu i gesti tènnichi ch'è sò apprezzati in Furiani. I cuntrolli, i «une-deux», i «passements de jambes», ti ne impippi.

## **10 U fretu averai...**

Sò anni è anni ch'è t'è vai in Furiani è di pettu à u fretu siberianu l'ai pruvate tutte, trè paghje di calzette, cinque pulare, sei slips, duie sciarpe, quattru paghji di guanti l'unu sopr'à l'altu, dui calzunetti è un cache-oreilles è puru ùn ci la faci : ti siccherai sempre à Armand Cesari, u stadu custruitu nù u più grossu lucacciu di l'universu

## **11 À Magagnà, pruverai...**

U spetàculu hè spessu pèssimu, è di tutte e manere, in ballò ùn ci capisci tant'affari : s'è cuntentu quandu Bastia marca è faci u musu tuttu u restu di u tempu. Allora t'annoi è ùn ti resta nunda d'altu ch'è di circa à magagnà i ghjucadori nemichi, ma ùn basta à vulè per truvà a magagna capace. È spessu, t'infanghi :  
O Diabaté, tu as le diabète,  
O Fournier, O Fourniret  
O Meniri, tu es pas de Filitosa ?

## **12 In depressione, serai...**

In a panuplia d'ogni sustenidore di u Sporting : un bellu stock di lexiomil...

**NOUVELLES  
FRONTIERES**

**3 av Mar Sébastiani  
20200 BASTIA**

**0 825 000 825**

[bastia.nf@nouvelles-frontieres.fr](mailto:bastia.nf@nouvelles-frontieres.fr)

# E vere dumande ch'ellu ci vole à pònesi

## Perchè cuntinuvà à mette e donne nant'à e liste elettorali ?

Dapoi Filitosa, a pulitica in Corsica hè un affare d'omi. Cù a parità, i sceffi di partiti si sò resi contu chì e donne esistianu è ch'ellu ci vulia à falli una piazza nant'à e liste. Allora, per ùn lascià cumpletamente a via à u periculu femminile, i nostri capimachja anu inventatu l'orrore di e « listes bicéphales », o liste « spare » (impair). L'idea : e piazze e più impurtante sò e nùmeru 1, 3, 5... E donne occuperanu e piazze 2, 4, 6... è li si face capisce chì di tutte e manere, ùn ghjuveranu à nunda. Dunque iè, si pò cuntinuvà à mette e donne nant'à e liste, ùn ci hè periculu ch'elle pigliinu u putere. Purtantu, ùn puderà esse peghju ch'è ciò ch'elli anu fattu l'omi sin'à avà, nò ?

## U PIB di a Corsica averà da supranà quellu di a Meurthe et Moselle ?

Quand'ellu difende u so bilanciu, Camille de Rocca Serra sà truvà l'argumenti chì pèstanu. À u dibattitu organizatu da RCFM/Corse-Matin, hè u solu à truvà chì a situazione ecunomica di a Corsica s'arrangia : « La Corse se développe, la Corse n'a jamais autant créé d'emplois, la Corse est en croissance (...) Faut pas dire que la Corse régresse, non ! Elle progresse ! » Accidenti ! Quessa pò hè un scoop ! Hè sicuramente u solu à rendesine contu ! Andate à dilla à a longa lista di i disimpiegati, di quelli chì toccanu u RSA, i Corsi chì sò obligati à parte pè truvà u travagliu è di i precarii. Cuntinuvendu in a so idea, Camillou s'infanga è cappia ancu chì « le PIB de la Corse a augmenté, la Corse est passée devant le Limousin... »







Sta volta hè troppu per u pùblicu di a sala chì si mette à ride è ancu à sciaccamanallu. Averia pussutu ramintà dinù ch'è no avemu tortu di lagnacci chì u PIB di a Corsica hè superiore à quellu di u Mozambique, di u Saharà Occidentale è di u Burkina Faso. Forza ! Soca un ghjornu averemu da richjappà u Cantal, u Lot-et-Garonne o u Calvados. Ma ùn ci vole micca à dumandanne troppu.

## Chì serà u prussimu duò di I Muvrini?

I Muvrini vèneni di sorte un duò cun u grande Grand Corps Malade. A canzona mezu-slam, mezu-cantu, si chjama Terranova. S'allonga a lista di i duò di i Muvrini chì anu digià cantatu cun Véronique Sanson, Nana Mouskouri, Stephan Eicher, MC Solaar, Sting, Anggun, Florent Pagny, à a Star Ac, Tina Arena, Renaud, Julie Zenatti, cù i Choristes è qualchidunu d'altri. À mumenti l'anu fatti tutti è per Michael

Jackson hè troppu tardi. Allora femu quantunque qualchì pruposta à i fratelli Bernardini : Johnny Hallyday (ma ci vole à fà in furia), Lady Gaga (serà megliu ch'è l'omatale malatu chì face u slam), o per esse appena più rock'n'roll ZZ Top è Amy Winehouse, o ancu i Black Eyed Peas. Chè o Ghjanfrancè ?

## Ci vole veramente à creà una squadra naziunale corsa di curling ?

Sì un ghjornu a Corsica hè indipendente (iè hè megliu à pensacci digià avà), puderà presentà squadre è spurtivi in tutte e cumpetizioni : Cuppa di u mondu di futbol, di rugby, Ghjochi Olimpichi ecc... Si ponerà dunque a dumanda di i ghjochi olimpichi d'inguernu è a so longa lista di sports strani : combiné nordique, luge, bobsleigh... è di siguru u curling cù i so spazzini di cotru. Ci sò i volontari per cummincià à intrenassi ?

# Intervista 1N2

incù Marina Raibaldi



**Napuleò o Pasquale Paoli ?**

1  2

U Bonaparte ! Marenga è cicculata, scimiscu ! Pasquale Paoli : brocciu è marrons glacés : un capu d'opara

**ACA ou GFCOA ?**

N 2

ACA ! Perchè ACA vincerà ! À l'ours !!!

**Simon Renucci o Simon and Garfunkel ?**

1 N

Ùn l'aghju mai intesu cantà à Simon Renucci...

**Plus belle la vie o A famiglia Pastasciù ?**

1 N

A famiglia Pastasciù, di siguru ! Simu tutti un pocu Pastasciù

**Davor Suker o Jean-Pierre Treiber ?**

N 2

Davor Suker ! Biscu sempre di quellu famosu macciu in 98 contr'à a Francia ! MI SMO HRVATI !

**Jacques Séguéla o Christian Clavier ?**

1  2

Match nul (mais surtout NUL) è in più ùn aghju sempre micca Rolex...

**Antidepressore o Anticiclону ?**

1 N

Anticiclону ! L'anticiclону ci ralegra u core senza arruvinà a SECU

**Hubert Tempete o Ouragan Katrina ?**

N 2

Tempête ! Hè un uraganu di magagna

**I giovani di l'UMP o i vechji di u PMU ?**

1  2

Paru, i vechji di u PMU mi facenu ride, l'altri dinù !

**Nelson Monfort o Dark Vador ?**

N 2

Nelson « pshhh » je suis ton père ! « pshhh »

**Nouvelle Star o Joey Starr ?**

1  2

La bataille des chorales ! È quale simu !

**Jean-Pierre Pernaut o Jacques Bastianesi ?**

1 N X

Jacques Bastianesi !

**Laurent Vitali o Laurent Romejko ?**

1 X 2

Paru ! S'assumiglianu un pocu nò ? Moltu più dipoi chì Lolo Vitalus mette i spechjetti.

**Evelyne Dhéliat ou Davia Bourgeois ?**

1 N X

Davia Bourgeois ghjè u mo mudellu ! Ùn li dicu micca chì dopu si monta a sega..

**Meteo France ou Mateo Falcone ?**

X N 2

Meteo France ! A mo siconda casa quantunque ! Ba ben ?

**Été indien ou rouleaux de printemps ?**

X N 2

On ira, où tu voudras quand tu voudras ! Et l'on s'aimera encore...

## Sustenite A Piazzetta : Abbonatevi !

NOME : \_\_\_\_\_ CASATA : \_\_\_\_\_

INDIRIZZU : \_\_\_\_\_

CODICE PUSTALE :

CUMUNA : \_\_\_\_\_

6 NÙMERI (15 €)

SUSTEGNU (30 €)

MANDATE U VOSTRU SCECCU  
À L'ORDINE DI :

L'ASSOCIU LINGUA SCRITTA  
1, RUELLE DU DRAGON  
20200 BASTIA



**3 000** caricamenti pè a  
prima applicazione corsa per  
iPhone !

Ùn hè micca una magagna, A  
Piazzetta hè ghjunta nant'à l'iPhone.  
Hè a prima applicazione d'un media  
corsu. Hè stata sviluppata da una  
intrapresa corsa, DuoApps !

A Piazzetta hè un giornale gràtisi  
chì esce tutti i dui mesi, publicatu  
grazie à u premiu Ghjovani in  
Mossa. S'è vo avete ancu voi un  
prughettu, andate à vede :  
[www.corse.fr/jeunesse\\_sport/](http://www.corse.fr/jeunesse_sport/)  
Stu giornale hè statu publicatu  
dinù grazia à l'aiutu di a  
cumpagnia Corsica Ferries.

Hè editatu da :  
L'associu Lingua Scritta  
Res. Orezza 2 20200 Bastia

Hè statu stampatu in Corsica  
à 10 000 esemplarii :  
Stamperia AZ Diffusion  
Erbaghjolu 20600 Bastia

ISSN : 2101-9193



L'anu **detta** nant`à [www.apiazzetta.com](http://www.apiazzetta.com)



U cane d'un  
prupietariu  
di residenza  
segundaria in  
Lumiu, chjamatu Guy  
Bedos, hè statu tombu. A nutizia  
s'hè ritrovata in tutti i media  
francesi. Scatinendu e passioni  
contr`à i Corsi. Allora ch'è no  
aspettemu sempre e riazioni  
di cundanna d'André Paccou è  
d'Emile Zuccarelli, publichemu  
unepochi di cummenti ch'elli anu  
postu l'internauti nant`à apiazzetta.  
com...

*È ch'hà dettu a SPA (Sucetà di i Pippol  
Arrabiatu) ? u spettatore*

*Un cursinu incù un patronu francesi pò essa  
chjamatu «collabo» ?  
Tarzan di a vechja cità*

*Di poi, Thomas Dutronc ùn lascia più i so teckel  
sorte senza bodyguards.  
Royal Canacciu*

*« Victime et martyr de la folie des hommes »  
Chì tanti Anna Politkovskaïa, Ghjuvanni Nicoli,  
Bobby Sands, o Giordano Bruno ! GWM*

**Les Dock's**

**Discothèque**

**Bar à vin**

**Tapas**

**NOUVELLE  
DÉCO**

**Macinaghju**



# Centru Culturale Universitariu

## Programmazione culturale

### marzu - lugliu 2010



Spaziu Culturale Natale Luciani  
Campus Mariani - Corti

8 ore  
30

**Spetàculu  
- Teatru  
Cortin Scena**

**Mercuri 17 marzu**  
« Crave (Manque) »  
di Sarah Kane

**Mercuri 24 marzu**  
« L'illusion comique,  
S'ella hè vera què... »  
di Pierre Corneille,  
U Teatrinu

**Mercuri 14 aprile**  
« Le Cantique  
des Cantiques :  
Opéra-Rock, entre  
le sublime et le  
terrestre »  
Association  
Culturelle Franco  
Roumaine  
Mnémosyne

**Mercuri 19  
maghju**  
« A Vindetta » di  
Marco CINI (Pisa),  
U Teatrinu

**Luni 14 ghjughnu**  
« Frades » di Antoni  
ARCA (Alghero), U  
Teatrinu

**Cuncerti  
Corsic'Artisti**

**Marti 16 marzu**  
Ensemble  
Instrumental de  
Corse

**Marti 23 marzu**  
L'Altri è Vitalba -  
Veranu musicale

**Marti 30 marzu**  
L'Altra Strada è

L'Arcusgi - Canti  
indiati

**Marti 6 aprile**  
Jakez Orkeztra

**Marti 13 aprile**  
Nathalie Simonetti  
è A Stantara - Fiatu  
novu

**Marti 11 maghju**  
L'Attrachju è Petru  
Santu Guelfucci -  
Versu paisanu

**Marti 18 maghju**  
Bull'ee

**Lugliu**  
Un Opéra « made  
in Corsica » -  
Prumitei, Centre  
des Arts du Feu,  
Francardu

**Entrata :**

10 €

5 € prezzu studentinu  
(Possibilità d'abbonamentu)

**Infurmazione è  
riservazione :**

Centru Culturale  
Universitariu  
Tel. 04 95 45 00 78  
lminico@univ-corse.fr

[www.univ-corse.fr](http://www.univ-corse.fr)



# F\*\*\* ME I'M UNA GLOSCIA

*Si chjama montasega o sbaccone. Ch'ellu sia bastiacciu, aiaccinu o portivehjacciu, ch'ellu sia à l'Acapulco, à u Rex o in Via Notte, hè sempre u listessu. Di siguru, ogni corsu ch'è si rispetta si deve d'avè almenu unu di st'elementi...*

## I capelli

cuppa « staracademizzata » cun trè tone di gel

## Sguardu azezu

perchè l'aria antipatica hè assai megliu per fà fughje e donne



## iPhone

per passà a serata à mandà SMS à i fratè. Eppò per u GPS dinù. Òn si sà mai, omu pò perdesi pè i carrughji bastiacci



## Chapelet

u patennostu hè purtatu di più per fà cum'è Beckham ch'è per fede religiosa, di siguru



## E paste

di siguru, a vita di sbaccone face ch'ellu ùn ferma guasi più nunda per manghjà in casa...



## U calzunettu ch'è si vede

à 60€ u slip, serà megliu ch'ellu si vea, nò ?



## Ray-Ban

e listesse ch'è quelle di Sarkozy, ma cumprate in Ventimiglia



## U Johnnie

iè, ci n'hè ch'è pensanu sempre ch'è u Johnnie hè un whisky corsu è di qualità...

## I muscoli

techju di « muscu » à a « sala », à u montasega li piace à mostrà i so pec

## Tattuasgiu nant' à u bracciu

u montasega copia i so tattuasgi nant' à i ghjucadori di futbol. Ne riparleremu da quì à 10 anni...

## T-shirt «panza apparente»

Di preferenza cù una scrittura in inglese ch'ellu ùn capisce micca

## E chjave di «l'Audi à papa»

per fà u maccu u sabbatu sera, hè megliu ch'è l'antica 205

